

Luis Pedro Peña Santiago parketxea Inaugurazioa

Lizarrusti, bizi-berritua

Atzo inauguratu zuten Gipuzkoako Diputazioko eta Jaurilaritzako agintariek Lizarrusti gaineko parketxea

Luis Pedro Peña Santiago izena jarri diote, Gipuzkoako mendizale nekaezin hura gogoan.


Gipuzkoa eta Nafarroa artean dago Lizarrusti mendatea, Ataun eta Etxarri-Aranatz arteko bidean. Bertan atzo goizean Luis Pedro Peña Santiago parketxea inauguratu zuten, Eusko Jaurilaritzak eta Gipuzkoako Foru Aldundiak elkarlanean zaharberritu duten eraikina.

Garai batean, Aldundiaren Hautamen eta Kamino etxea zen eraikin hori. «Oso gaizki zegoen, ordea», azaldu zuen atzo Aralar Parke Naturaleko arduradun Iñaki Aizpuruk. Horregatik, bertan behera utzitako lau horma zahar haiei bizi berria ematea erabaki zuten aipatu erakundeek. «Ehun milioi pezeta erabili dituzte horretarako».

Dirutza horren emaitza atzo begien bistan jarri zuten parketxeko arduradunek Gipuzkoako diputatu nagusi Roman Sudupe, Jaurilaritzako Nekazaritza sailburu Iñaki Gerenabarrena eta Foru Aldundiko nekazaritza diputatu Iñaki Txueka bertan zirela. Irribarrez esku hartu zuten guztiek inaugurazio ekitaldian, eta hitz ederrak izan zituzten ahotan eta gogora ekarri zituzten parketxe honek izango dituen bi helburu nagusiak: ingurugiro naturala zaintzea -Gipuzkoako aldean parke naturala da Aralar- eta bertara hurbiltzen direnei harrera egin eta aterpea eskaintzea.

Atarian, mendizale handi bat

Inaugurazioa egin ondoren, agintari, etxeko arduradun,



PABLO S. QUIZA

Lizarrusti gaineko etxe zaharra, txukun txukun zaharberritua. Aterpetxe bihurtu dute.

eta gonbidatuak etxe barrura sartu ziren. Atea zeharkatu orduko, ezker aldean, Luis Pedro Peña Santiagoren argazki bat ikusi zuten guztiek, honako hitz hunkigarriekin hornitua: «Oroime-neko bidezidorretan maiz egiten dugu topo». Etnologo eta mendizale nekaezina izan zen Peña Santiago, hainbat liburu eta ikerlanen egilea. Haren izena jarri diote parke-txeari.

Ondoren, bertaratu zirenek parketxea barru-

tik ondo miatzeko parada izan zuten. Eraikin berri-berria da eta 40 lagunek lotarako tokia dute bertan. «Etxe honek mendi-aterpea izan nahi baitu», azaldu zuen Iñaki Aizpuruk. Sukaldea eta jantokia ere baditu, hurbiltzen diren guztien gozagarri.

Ildo berean, parketxeak Aralar ezagutaraztea du helburu, eta bertaratzen diren guztiei paraje zoragarri horri buruzko informazioa ematea. Diaporama bat

atundu dute propio horretarako, eta foileto piloa ipini dute etxeko atarian, guztien eskuragarri. Ildo berean, ibilbide gidatuak, ikastaroak... orotarikoak antolatuko dituzte. Izan ere, Felipe Uriarte mendizale ezagunaren gidaritzapeko enpresak hartu du parketxea kudeatzeko ardura.

Parketxea zerbitzu horiek guztiak eskaintzen ekain aldera hasiko da. Atzo, atariko urrats gisa, inaugurazioarekin bat, *Parke naturala*. Aralar liburua aurkeztu zuten bertan, Gema Arrugaetaren argazkiz osaturiko liburu zoragarria.

Arantxa Iraola
LIZARRUSTI

Joan-etorrian

Duela hamarkada batzuk 16 familiaren bizilekua zen Lizarrusti, eliza eta eskola propioak zituen mendate bizia. Orain familia bakarra bizi da, eta bertaratuko diren *bizilagun* berriak, joan-etorri lasterrekoak izango dira, Aralar bisitatzera doazen mendizale eta turistak.

Nafarroako Gobernuak baztertuenei etxeak eskuratzen laguntzeko akordioak sinatu ditu

■ *Pobreziaren Kontrako Sarean lanean ari diren hainbat talderekin sinatu ditu akordioak*

Europa Press / Iruñea

ATZO goizean Nafarroako Gobernuak ordezkari Yolanda Barcinak eta Calixto Ayesak hitzarmenak sinatu zituzten Pobreziaren Kontrako Sarean lanean ari diren hainbat erakundetako ordezkariekin. Horien helburua gizarteko talderik baztertuenei etxebizitzak eskuratzeko bideak erraztea da.

Guztira 400 milioi pezeta erabiliko ditu Nafarroako Gobernuak akordio horietan hitzartutakoa betetzeko. Atzo, hain justu, La Majari, Traperos de Emaus, Santa Lucia-Adsis, Nafarroako Formazio eta Enplegu elkarte eta Andrea erakundeekin sinatu zituzten hitzarmenak, eta urte hasieran beste antzeko bat sinatu zuten Caritasekin.

Modu honetan, atzo aditzera eman zuten, 117 etxebizitza eskuratzeko bidea erraztuko du Nafarroako Gobernuak. Horiek Bazterketa Sozialaren Aurkako Planean iragarritakoak baina gehiago izango direla adierazi zuten, eta pozgarria dela horrelako ekimenetan esku hartzea.